

Dr. M: Sudahkah Melayu berjaya?

UM 2 2 JUN 2001

KUALA LUMPUR 21 Jun — Presiden UMNO, Datuk Seri Dr. Mahathir Mohamad hari ini mengajak orang Melayu membuat penilaian sama ada mereka sudah menjadi bangsa yang benar-benar berjaya dan bermaruah.

Beliau berkata, sehingga ini benarlah orang Melayu tidak hilang tetapi apakah jenis Melayu yang tidak hilang itu.

“Selama 450 tahun mereka hidup di negeri mereka sendiri sebagai hamba bangsa-bangsa asing. Sekarang mereka sudah bebas dan dapat memerintah diri sendiri.

“Tetapi apakah mereka sudah menjadi bangsa

yang berjaya dan bermaruah?” soalnya ketika merasmikan Perhimpunan Agung UMNO di Pusat Dagangan Dunia Putra (PWTC) hari ini.

Dalam ucapan dua jam bertajuk *Melayu Mudah Lupa*, Presiden UMNO turut mempersoalkan apakah orang Melayu sudah mendapat pelajaran daripada sejarah mereka terutama sejarah dijajah, sejarah politik, sejarah ekonomi, sejarah agama dan sejarah keilmuan mereka.

Dr. Mahathir menarik perhatian bahawa berkata, para pemimpin UMNO semasa menuntut kemerdekaan telah melakar kebijaksanaan apabila telah

menjalin satu sistem kerjasama antara kaum yang amat bijak dan istimewa.

Sementara identiti kaum dikekalkan, kerjasama dalam satu parti campuran dicipta yang tidak membelakangkan kedudukan orang Melayu sebagai bumiputera anak watan.

“Inilah bukti kebijaksanaan orang Melayu dan pemimpin-pemimpin mereka iaitu pemimpin UMNO yang menggunakan akal fikiran dan tidak nafsu dalam pengurusan negara yang baru merdeka,” katanya.

Beliau berkata, jika pada masa itu terdapat pemimpin Melayu yang tamak dan cuba merebut

semua untuk orang Melayu, hari ini Malaysia bukan sahaja tidak aman tetapi tetap mundur seperti kebanyakan negara membangun yang lain.

“Mungkin rusuhan berlaku sepanjang masa,” katanya sambil menambah di Malaysia bukan sahaja terdapat kaum yang berlainan tetapi perbezaan itu ditokok tambah dengan kelainan bahasa, budaya dan agama.

“Sesungguhnya campuran ini amat mudah meletup,” kata beliau.

Bagaimanapun langkah yang telah diambil oleh pemimpin UMNO itu telah menunjukkan kebijaksanaan kepimpinan Melayu UMNO dalam politik dan pentadbiran, tambahnva.